

HEADLINES (MORNING) Date – 08/10/2024

Time - 7:30 -7:40Hrs

REGIONAL NEWS BULLETIN

- 1. NGO Co-Ordination Committee chuan, Mizorama Petrol leh Diesel chhiah pun chu tihniam leh turin sorkar nawr an rel.**
- 2. Thlaleh ni 5-a neih tur Sinlung Hills Council inthlan chuh turte hming puan tan a ni.**
- 3. Vawiinah Jammu and Kashmir leh Haryana Assembly inthlan vote chhiar a ni dawn.**
- 4. India chuan Maldives tanpui nan dollar maktaduai 400 pek belh leh bilateral currency swap cheng vaibelchhe 3000 hu neih a remti.**

<><><>

NGO

NGO Co-Ordination Committee thukhawm chuan, Mizorama Petrol leh Diesel hralhchhuah atanga chhiah a tihpun chu a punna a sang lutuk a, Mizoram mipuite tan phurrit lian tak tling an ti.

Nimin tlaia Aizawl Tuikhuahtlang Central YMA Committee Room-a NGO Co-Ordination Committee thukhawm chuan, chhiah pun hi tihniam leh turin Mizoram sawrkar-ah ngenna siam ni se an ti a, he kan hmalakna kalpui a nih chhung chuan eng pawl mahin mipuite nghawng thei zawnga hma la rih lo turin an ngen tih an sawi bawk a ni.

Hetihlai hian Mizoram Commercial Vehicle Union (MCVU) General Headquarter chuan tuialhthei man tihniam tura sorkar an nawrna an hlawh chham avangin, tun thla ni 14 zing dar 6:00 atangin tiam chin awm lova din a ni dawn tih an sawi a ni.

Oil man tihsan atang khan Commercial Vehicle zawng zawng Motor eizawn nan a hmang te, eizawna a nghawng nghal a, Sawrkar ah an mahni rate san ve mai ni se tia an ngaihtuah laiin nitin mamawh ei leh bar zawng zawng a nghawng nghal dawn avangin mipui te harsatna siam tlem zawngin motor fare hrang hrang tisang lova Oil man tihniam tura ngen zawk an ni a, an ngenna a hlawhtling ta lo chu pawl an ti a, oil man a hniam ngei theih nan a tawp thlengin an tang dawn a ni an ti.

Sawrkar in chhiah an pun avanga cheng vbc 92 leh nuai 84 hmuh an tum avanga, Zoram mipui te a sawrfu chu an hrethiam thei lo tih an sawi a ni.

◇◇◇◇

COUNCIL OF CHURCHES IN MIZORAM

Mizoram chhunga Kohhran hrang hrangte thawhhona leh rawngbawl tlanna tur, Council of Churches in Mizoram (CCM) rorel inkhawm neih a ni dawn.

He thu hi nimin khan Aizawl Press Club-ah Mizoram Kohhrante Inpumkhatna Joint Comt Chairman, Synod Moderator Rev R Vanlalnghaka kaihhruai Mizoram Kohhrante Inpumkhatna Joint committee chuan an sawi a, CCM puala rorel inkhawm hmasa ber chu Mission Veng Presbyterian Kohhran Biak Inah tun thla ni 26 inrinni chawhnu dar 12:30 a neih a nih tur thu leh hemi pual hian inrinni zan, Pathianni chawhma, chawhnu leh zanah Pathian biak inkhawm neih a nih tur thu an sawi bawk.

Kohhran hruaitu kalkhawmte hian CCM din a nih chhan tarlangin Kohhran tinin thurin leh chin dan an neih te dahtha a, mimal, khawtlang leh sorkar inrelbawlina tih hmasawna kawnga thu khat vua a tan ho tum a nih thu an sawi.

Tun dinhmunah Council of Churches in Mizoram ah hian Mizoram chhunga kohhran pariat, Mizoram Presbyterian Kohhran, Mizoram Baptist Kohhran, Evengelical Church of Maraland, Lairam Isua Krista Baptist Kohhran, Evangelical Free Church of India, Isua Krista Kohhran, Independent Church of India leh Wesleyan Methodist Church of Mizoram te an tel niin an sawi a, Kohhran pawl dang la tel ve lote pawh tel turin an sawm a ni.



SHC CANDIDATES

Sinlung Hills Council inthlan thlaleh ni 5-a neih turah nimin khan Zoram Peoples Movement ZPM leh Mizo National Front MNF Party ten an candidate tur an puang.

State-a rorel lai Zoram People's Movement Vice President leh Election Committee Chairman Pu W. Chhuanawma'n ZPM Candidate tur mi 8 hi wawiina an party chhung inkhawm ah a puang a, Sinlung Hills Council-a bial 12 awm ah bial 8 an chuh dawn a, an thawhpui HPC Party in bial 4 an chuh thung dawn a ni. Tun thla ni 1 khan ZPM Party President Pu Lalliansawta leh HPC Party President Pu Rohringa te chuan party pahnih te Sinlung Hills Council inthlana thawk dun turin inremna an lo ziak tawh a ni.

Mizo National Front pawhin Sinlung Hills Council-a an candidate tur hi puangin bial 10 an chuh dawn a, an thawhpui Hmar People's Convention (Reformation) chuan bial 2 an chuh thung dawn a, Sakawrdai North leh South bak chu MNF candidate vek an ding dawn a ni.

Sinlung Hills Council ah hian Congress pawhin candidate an nei dawn a, wawiin hian Party President Pu Lal Thanzara'n an party office ah a puang ang.

Sinlung Hills Council term hi kumin November ni 21 ah a tawp dawn a, Aizawl District-ah Constituency 6 awmin Polling Station 19 zingah Critical Polling Station 6 a awm a, Kolasib District-ah Constituency 2 awmin Polling Station 7 a awm a, a vai hian Critical Polling station-a puan a ni a, Saitual District-ah Constituency 4 awmin Polling Station 12 a awm a, heng zingah hian Polling Station 3 te chu Critical Polling Station atana puan an ni bawk. Sinlung Hills Council ah hian voter 23,789 an awm a, heng zinga 11,875 chu mipa niin, 11,914 chu hmeichhia an ni a, Constituency 12-a awm a ni.

Sinlung Hills Council hi kum 2019 khan inthlan hmasa ber neih niin MNF leh HPC tangruah chuan sawrkarna anlo siam tawh a, tun dinhmunah ZPM leh HPC Party ten sawrkar siam mekin kumin inthlan lo awm turah pawh an thawk dun dawn ni.



UIDIC

Chief Secretary Dr. Renu Sharma chuan zirlai naupangte samkhai zawka an nihna kimchang chhinchiah awlsam theih nan school-a special MBU camp neih dan ruahman turin School Education Department a hriattir.

State Level Unique Identification Implementation Committee chu kar hmasa khan thukhawmin Chief Secretary Dr Renu Sharma chuan kum 5 leh kum 15 nih hunah Mandatory Biometric Update (MBU) neih a pawimawh thu sawiin, School Education Department chu school naupangte'n samkhai zawka an nihna kimchang ziah luh theih nan school-a special MBU camp neih dan tur ruahman turin a hriattir a ni.

Deputy Director General, UIDAI, Regional Office, Guwahati Commodore Dhiraj Sareen chuan Mizoram Sawrkar chu online Birth Registration No. kalflanga naupang kum 5 hnuai lamte ziahluh zel tum turin a ngen a. Registrar-te chu nau piang hlimte an pian hnu lawkah Aadhaar No. pek chhuah nghal zung zung an nih theih nan Birth Registration Based Aadhaar Enrollment kalpui turin a fuih a. Mizorama Birth Registration Based Aadhaar Enrollment kalpui a nih theih nan National Health Mission, Mizoram chu UIDAI hnuaih Registrar atan ruat a ni a. BRBAE hlawhtling taka kalpui a nih theih nan UIDAI chuan Civil Registration System Portal-a nau piangte ziahluh zung zung a nih theih nana State policy ruahman turin rawtna a siam a ni.

Thutkhawmah hian Aadhaar chungchanga thu pawimawh hrang hrangte sawiho a ni. Aadhaar inzialuh kalpui dan thlirho a ni a, Mandatory Biometric Update & Birth Registration Based Aadhaar Enrolment chungchang sawiho a nih bakah District Level Aadhaar Monitoring Committee-te hnathawh dan thlirlet a ni bawk.



AIZAWL HMATHLIR PAWL

Aizawl Hmathlir Pawl leh UD&PA department hotute chuan, nimir khan Mahatma Gandhi lim dah thinna a mipui chawlh hahdamna tur siam an enfiah a.

Aizawl Hmathlir Pawl te chuan khawpui kawng dunga sawrkar ram, khaw hawi nuam leh thawveng zawnga siam a ni lo zel chu tha ti lovin, Assam Rifles Quarter Guard ep a Mahatma Gandhi lim dah thinna-a mipui chawlh hahdamna hmun UD&PA Department-ten a an siam mek chu brick hmanga a bang hung vek an tum ni a hriat ANIH avangin UD&PA minister Pu K Sapdanga hmu in an duh dan an thlen a, minister ruahmanna in vawiin khan he pawl hruaitute leh UD&PA lamin an enho a ni.

Aizawl Hmathlir pawl te chuan brick rem chin chu tih hniam a, concrete-a a chung nei tur pawh thiah leh a, a hungna tih san chu an duhdan a ni tih thlenin, UD&PA engineer lamten thil tih theih tho a nih thu in an chhang a, An in sak a coffee dawr dah an tum pawh a hmunhma a chep avangin dah loh theih nise, tih rawtna chu UD&PA lam nen hian an pawm tlang bawk.

Mahatma Gandhi lim Assam Rifles Quarter Guard ep a dah thin chu siamthat a nih chung hian Pachhunga University College campus, College Vengah dah a ni a, PUC lam hian awm zui zel se an duh avangin sawrkar chuan MINECO Green Park-a dah tur Gandhi lim dang an siamtir a, dah theiha peihfel a ni tawh ni a sawi a ni.

<><><>

COUNTING OF VOTES

Vawiinah Jammu and Kashmir leh Haryana Assembly inthlan vote chhiar a ni dawn. Zing dar 8 atangin vote chhiar tan tur a ni a. Postal Ballot te chhiar hmasak a ni ang. Election COMmission chuan tuang taka vote chhiar anih theih nan ruahmanna tha tak a siam a. Venhimna pawh khauh taka kalpui a ni.

Jammu and Kashmir-ah hian candidate 873 an awm a. Counting center 28 siam a ni a. Assembly bial 90 ah tun September ni 18 leh ni 25 ah leh October ni 1 ah te vote thlak a ni a.

Haryana ah hian Counting sentre 90 siam a ni a. Assembly member 90 thlang turin tun thla ni 5 khan vote thlak a ni a. Candidate 1031 te dinhmun vawiinah tihchian a ni ang.

<><><>

INDIA & MALDIVES

India chuan Maldives tanpui nan dollar maktaduai 400 pek belh leh bilateral currency swap cheng vaibelchhe 3000 hu neih a remti. He hmalakna hian tuna sum leh paia tlachhe mek Maldives ram tan inkhaichhuahna hun tha a pek ngei beisei a ni a. Nimina Prime Minister Narendra Modia leh Maldives President Dr.Mohamed Muizzu te New Delhi-a an inkawm hnuah heng thutlukna hi siam a ni a. Heng bakah hian ram pahnihte chuan thawhdunna tur inremna thuthlung MoU ziakin eirukna do tura thawhdunte an rem ti a.

Maldives Judicial officer te tana Capacity Building Program neih thin tuaithar leh bakah Sports and Youth Affairs lama hmalak chhonzawm an rel bawk a ni.



NOBEL PRIZE

Victor Ambros leh Gary Ruvkun te chu microRNA an hmuhchhuah avangin Nobel Prize in Physiology or Medicine 2024 dawng tura thlan an ni. Scientist pahnihte thil hmuhchhuah avang hian mihring taksa chhungril hriatchianna kawngah hmasawna a thlen phah a ni.

Chawimawina hian dollar maktaduai 1.1 a keng tel a ni. 1901 atanga he chawimawina pek anih hnuah tun tum ami hi Nobel Prize in physiology or medicine dawng thei 115 na an ni dawn a. Mi 229 dawng tawh zingah hmeichhia 13 an awm a ni.

